

Mick Antoniw AS

Y Cwnsler Cyffredinol a Gweinidog y Cyfansoddiad

03 Chwefror 2023

Annwyl Mick

Y Pwyllgor Deddfwriaethol, Cyfiawnder a'r Cyfansoddiad, 16 Ionawr 2023 - Cyllideb Ddrafft Llywodraeth Cymru ar gyfer 2023-24 (gwariant mewn perthynas â chyfiawnder) a gwaith craffu cyffredinol

Diolch am ymddangos gerbron y Pwyllgor ar 16 Ionawr ac am roi tystiolaeth ar faterion yn ymwneud â Chyllideb Ddrafft Llywodraeth Cymru ar gyfer 2023-24, yn benodol o ran gwariant mewn perthynas â chyfiawnder, ac am ateb cwestiynau mwy cyffredinol ynghylch eich cyfrifoldebau portffolio.

Mae nifer o faterion nad oeddem yn gallu eu codi gyda chi yn ystod y cyfarfod. At hynny, mae materion yr hoffem fynd ar eu trywydd ymhellach.

Byddwn yn ddiolchgar o gael eich ymatebion i'r cwestiynau sydd wedi'u rhestru yn yr Atodiad erbyn 23 Chwefror 2023 (mae cyfeiriadau at Gofnod y Trafodion ar gyfer y sesiwn dystiolaeth wedi'u darparu lle y bo angen).

O ystyried ein dyddiad cau ar gyfer adrodd ar y memoranda cydsyniad deddfwriaethol ar y Bil Cyfraith yr UE a Ddargedwir (Dirymu a Diwygio), byddwn yn ddiolchgar o gael ymateb i gwestiynau 7 i 10 erbyn canol dydd ar 10 Chwefror 2023.

Yn gywir,

Mew Iwanca-Davies



Atodiad

Cyfiawnder

1. Yn eich gohebiaeth at y Pwyllgor, fe wnaethoch ailadrodd ymrwymiad Llywodraeth Cymru i gyflwyno deddfwriaeth i greu system dribiwnlysoedd wedi'i moderneiddio i Gymru. A allwch chi roi unrhyw newyddion ar y gwaith sydd ar y gweill i baratoi ar gyfer y ddeddfwriaeth honno a phryd y gallem ddisgwyl iddi ddod gerbron y Senedd?

Deddf Marchnad Fewnol y DU 2020

2. A yw Llywodraeth Cymru yn dal i fwriadu defnyddio Bil Diogelu'r Amgylchedd (Plastigau Untro) (Cymru) fel enghraifft ymarferol mewn her gyfreithiol yn erbyn Deddf Marchnad Fewnol y DU (ar faterion nad ydynt yn ymwneud â chymhwysedd deddfwriaethol), ac os felly pa lwybr fyddwch chi'n ei ddefnyddio?
3. Gwnaethom eich holi'n fanwl am effaith Deddf Marchnad Fewnol y DU (Cofnod y Trafodion 94-115). Gwnaethoch ddweud wrthym:

"I think the fact that the single-use plastics Bill has now been passed, will be going for Royal Assent now—. I think there is a period of time before implementation, because of the World Trade Organization requirements, et cetera, but the Attorney-General has clearly taken the decision that it's not a matter to be referred to the Supreme Court, and I'm content to accept that. It doesn't mean that there aren't issues with the internal market Act, but they may arise at a later stage." [Ein pwyslais ni].

O ran y frawddeg olaf, a allwch egluro beth yw'r problemau posibl gyda'r Ddeddf a phryd y gallech ddisgwyl iddynt godi?

4. Yn ystod dadl yn y Cyfarfod Llawn ar gynnig cydsyniad ar gyfer y Bil Technoleg Enetig (Bridio Manwl) ar 17 Ionawr, dywedodd y Gweinidog Materion Gwledig: "Pan fo'r Senedd yn deddfu, maen nhw'n gwneud hynny'n rhydd o UKIMA, felly gellir gwneud deddfwriaeth Senedd sylfaenol mewn maes datganoledig yn rhydd o ofynion UKIMA" [Cofnod y Trafodion, y Cyfarfod Llawn, para 439]. Mae'n amlwg nad yw Deddf Marchnad Fewnol y DU yn effeithio ar gymhwysedd y Senedd i wneud deddfwriaeth, ond ein pryder o hyd yw y gall y Ddeddf gael effaith ymarferol ar weithrediad deddfwriaeth o'r fath ar ôl iddi ddod i rym. A allwch chi nodi ar ba sail y mae Llywodraeth Cymru wedi dod i'r casgliad nad yw darpariaethau mewn Deddf y Senedd yn;
 - 'ofynion perthnasol' at ddibenion yr egwyddor cyd-gydnabod ar gyfer nwyddau yn adran 2 o Ddeddf Marchnad Fewnol y DU;

- 'gofyniad deddfwriaethol' mewn perthynas â gwasanaethau, yn unol ag adran 17 o Ddeddf Marchnad Fewnol y DU?
5. O ystyried barn Llywodraeth Cymru ar y Bil Technoleg Enetig (Bridio Manwl), a fyddwch yn ceisio eithrio technolegau genetig o'r egwyddorion mynediad i'r farchnad yn Neddf Marchnad Fewnol y DU os daw'r Bil yn gyfraith?

Cysylltiadau rhynglywodraethol

6. Mae nifer fawr o anghytundebau parhaus ynghylch deddfwriaeth rhwng Llywodraeth Cymru a Llywodraeth y DU, yn enwedig ynghylch Bil Cyfraith yr UE a Ddargedwir. A yw Llywodraeth Cymru wedi ystyried defnyddio'r mecanweithiau datrys anghydfodau rhynglywodraethol i fynd i'r afael â'r materion hyn? Os na, pam ddim? A yw'r mecanweithiau'n gwbl weithredol?

Bil Cyfraith yr UE a Ddargedwir (Dirymu a Diwygio)

7. A fydddech cystal â rhoi'r wybodaeth ddiweddaraf am gydweithio rhynglywodraethol a rhoi gwybod am unrhyw gynlluniau ar y cyd y cytunwyd arnynt hyd yma?
8. Pa gamau y byddwch yn eu cymryd os bydd y Senedd yn gwrthod rhoi cydsyniad i'r Bil a sut y byddwch yn tynnu sylw Senedd y DU at unrhyw bryderon sydd gennych?
9. Pa gamau y byddwch yn eu cymryd os daw'r Bil yn gyfraith wedyn, heb y gwelliannau yr hoffech eu gweld yn cael eu gwneud?
10. A yw Llywodraeth Cymru o'r farn bod gan y Senedd y cymhwysedd deddfwriaethol i gyflwyno Bil i Gymru a fyddai'n diwygio Bil Cyfraith yr UE a Ddargedwir (Dirymu a Diwygio) (os a phan y'i deddfir) er mwyn diwygio'r dyddiad machlud fel y mae'n gymwys ar hyn o bryd ar gyfer cyfraith yr UE a ddargedwir mewn meysydd datganoledig? A yw Llywodraeth Cymru yn ystyried cyflwyno Bil o'r fath os bydd y dyddiad machlud, sef 31 Rhagfyr 2023, yn parhau yn y Bil?

Hygyrchedd y Gyfraith

11. Pa gynlluniau sydd gennych ar gyfer 2023-24 i wella hygyrchedd cyfraith Cymru?
12. A allwch chi roi'r wybodaeth ddiweddaraf ynghylch pryd y bydd Llywodraeth Cymru yn cyflwyno deddfwriaeth i gydgrynhoi cyfraith cynllunio?
13. Pa gynnydd y mae Llywodraeth Cymru wedi'i wneud o ran cydgrynhoi ac ail-wneud Gorchymyn Cynulliad Cenedlaethol Cymru (Cynrychiolaeth y Bobl) 2007?
14. Sut caiff hygyrchedd y gyfraith ei ystyried pan fydd Llywodraeth Cymru yn penderfynu a ddylid cytuno i Ffiliau'r DU wneud darpariaethau mewn meysydd datganoledig? A oes unrhyw fath o asesiad risg neu asesiad tebyg yn cael ei gynnal?

Deddfwriaeth

15. A oes unrhyw feysydd polisi yr ydych yn rhagweld y bydd angen maint sylweddol o is-ddeddfwriaeth ar eu cyfer dros y 12 mis nesaf?
16. Pa is-ddeddfwriaeth sylweddol, os o gwbl, y mae'n rhaid ei chyflwyno yn y flwyddyn galendr hon, efallai i weithredu Deddfau a basiwyd gan y Senedd yn y blynyddoedd diwethaf neu oherwydd bod yn rhaid gwneud rheoliadau newydd neu ddiweddarau rheoliadau?
17. A oes gan Lywodraeth Cymru yn ei chyfanrwydd restr o flaenoriaethau o ran is-ddeddfwriaeth y mae'n rhaid ei gwneud, neu a fydd yn cael ei gwneud, yn 2023? Os oes gan Lywodraeth Cymru restr o flaenoriaethau, sut y bydd yn dad-flaenoriaethu, neu pa gynlluniau wrth gefn sy'n cael eu rhoi ar waith, os oes angen symud ffocws adnoddau'r llywodraeth i ddrafftio is-ddeddfwriaeth sydd ei hangen i achub neu ddiwygio cyfraith yr UE a ddargedwir?

